

ptus, sine ulla cæde rerum potiretur. Haud quidem cessavit ille in tanta gerendæ rei occasione: sed silentio noctis cum expeditissimis copiis ad urbem venit, quas per averfa ab hostibus loca, ne quid illi præsentire possent, mœnibus admotas, cæsis portarum vigilibus, proditores in urbem sine alia majore cæde accipere. Baldoinus, & Panthaleo Justinianus Antistes ad primum captæ urbis tumultum excitati, cum necessariis preciosissimisque rebus, quas nocturna illa trepidatione secum asportare potuerunt, ad Euripum se trepide receperunt: ubi navem ingressi, continua navigatione in Eubœam sunt delati. Quidam auctores sunt, Baldoinum cum omnibus copiis abfuisse, quum urbs Palæologo tradita est. Verum sive domi sive foris esset, satis constat, Constantinopolim per hunc modum amissam, anno postquam a Venetis Gallisque capta est, octavo ac quinquagesimo: vel, ut alii ajunt, tertio & sexagesimo. Veneti & ad Pontificem miserunt, & cum ipso Baldoino ad Lodovicum Galliæ Regem: utrobique nec data, nec omnino negata auxilia. Interim quia apparebat in tanto rerum successu Palæologum non quieturum, Marcum Michaellem cum duodeviginti triremibus ad tuendas pelagi insulas cum omni maritima ora mitti placuit: cui in primis illud mandatum, ut nullam in Palæologi rebus infestandis prætermitteret occasionem. Quod tam cupide strenueque factum ferunt, ut inter omnes constiterit, illum desperatione rerum brevi fuisse Byzantium relicturum, nisi Genuenses in Venetorum invidiam sese auxiliares ei præbuisent. Quippe qui, societate inita, omnem classem, quam in Syria habebant, præpotentem quidem, ac ea longe instructiorem, quam ante cladem inter Tyrum & Ptolemaidem acceptam habuerunt, in Græciam misere. Horum viribus fretus Palæologus, tentavit in Peloponnesum sui Imperii fines promoveri: quod ut brevi conficeret, Guilelmum, quem acie ab eo victum, & in vincula adductum diximus, ea conditione missum fecit, ut sibi in Peloponneso Epidaurum traderet; sic enim veteres dixere oppidum in sinu Argolico, quod hodie corrupto nomine *Malvasiam* vo-

1260
Palæologus,
Baldoino
ejecto, By-
zantium
occupat.